

Mbanjbuzlit: Aenmbanj Ndaw Rungh-bya Ndaej Vut Gungz Baenz Fouq

天等县立屯：封闭小山村由贫困走向富裕

□ Vangz Sinhyungz sij/ingj

Song henz roen bakmbanj haexyangz heuswd.

Denhdwngj Yen Dozganh Yanh Mbanjbuzlit vunzlai naihaemz guh 24 bi, baengh fwngz geuh mbaq gwed vat diuz deihoengq ok bya ndeu, liencomz ok cungj cingsaenz Mbanjbuzlit "Cingznyienh naihaemz buekguh mbouj nyienh youq ndaw haemzhoj coegcamz". Cib lai bi gvaqdaej, gyoengq vunzmbanj mbouj deq mbouj baengh, laebdaeb naihaemz haenq-rengz buekguh, baez yiengh baez yiengh gaijgez le gij vwndiz byaij roen hoj, yawjbingh hoj, ndaemganq hoj, gwnraemx hoj, doegsaw hoj, ranzyouq hoj, vutvak le aenmauh gungzndoq, angqyangz byaij coh biengz siujgangh.

Dwen daengz Mbanjbuzlit, hauj-lai vunz cungj rox, cingsaenz Mbanjbuzlit "Cingznyienh naihaemz buekguh mbouj nyienh youq ndaw haemzhoj coegcamz" dwg aen sigij gonq Guengsae raeuz aen yienghndei banggunz gunggeng ndeu. Daj bi 1973 hwnj, vunzlai mbanj neix youq Nungz Siyingh daengj sam nyaemh cunh dangcihbu suhgi daiqlingx lajde, gag baengh goengrengz bonj-faenh, seizhwnq seiznit cungj mbouj dingz dwk geuh rin vat doeng diuz deihoengq raez 460 mij, gvangq 4.6 mij, sang 4 mij ndeu, fuengbienh vunzmbanj hauejok rog bya, vunzmbanj gaxgonq yungh baenz diemj lai song diemj cung bin bya ok mbanj bienqbaenz cij yungh geij faen cung, gaijbienq le gij yiengh gungzhoj doeklaeng aenmbanj. Bi 1997, Mbanjbuzlit ndaej laeb guh daengx guk diegbya yienghndei banggunz gunggeng, cunhchisuh Nungz Siyingh ndaej senj dang bouxdaibyauij cibhaj daih dang raeuz.

Vih dawz gij cingsaenz Mbanjbuzlit swncien roengzbae, bi 2013 ndaw mbanj soucomz gij doxgaiq vat deihoengq yungh gvaq haenx, laebhwnj "bozvuzgvanj deihoengq". Gij gangciem geuh rin hed goz haenx, aen huzraemx mwh guhhong yungh haenx, aen daengmax damq roen geuh rin yungh haenx, aen loengxfaex gien ngaenz comz ngaenz yungh haenx, fagcanj, aengei vat rin daeh rin yungh gvaq haenx…… yiengh dem yiengh venj baij youq gwnz dat song henz ndaw deihoengq, yap hauej lwgda vunzraez. Song henz gwnz dat bak deihoengq, lij faenbied aeu benjrin gaek miz gij siengq guhhong doengh bi haenx caeuq sawcih gaisau vat



▲ Douhung bakmbanj soengz hen mbanjbya.



▲ Aen gingj gyaundeidei ndaw mbanj ndeu.



▲ Ndaw ranzaw venj baij ceksaw caeuq lizsij vwnzva aenmbanj.

deihoengq cingzgvang. "Bozvuzgvanj deihoengq" Mbanjbuzlit baenz le Denjdwnj Yen dangjyenz ganbu naihaemz buekguh gyauyuz gihdi, seiz mbouj seiz couh miz danhvei cujiz dangjyenz ganbu bae yawjgonz hagsib, guh naihaemz buekguh gyauyuz hozdung, doengzseiz caemh yinx gij dangjyenz ganbu diegwnq bae yawjgonz, daengx guk mizmingz.

Mbanjbuzlit doeng roen le, vunzmbanj lij laebdaeb vat cingj yinx raemx, gaijgez gwnraemx hoj vwndiz; vunzmbanj gaenxmaenx guh ndei gak cungj swngchanj, ndaem haexyangz guhceh, ndaem oijdangz caeuq ok rog dajgoeng, souhauej caemh bi beij bi lai. Daengx mbanj 120 ranz 500 lai vunz, moix bi cungj miz 200 lai vunz okrog dajgoeng, moix bi ndaej



▲ Ndaw deihoengq ronghsag roen bingzbwd.



▲ Mehmbwk ndaw mbanj seizhoengq bang gunghcangj gyagoeng di doxgaiq dem souhauej.



▲ Bak deihoengq miz siengqdeu caeuq lanz gaisau.



▲ Mbanjbya iq mingzdaeuz hung.



▲ Lanzsenhconz ndaw mbanj.

ngaenzhong maranz 100 lai fanh maenz; lij miz 100 lai vunz seiz hong soeng bae si yienh henzgyawj guh hong raemj oij, dajcaep, moix ndwen ndaej souhauej 3000 maenz hwnj-roengz. Seizneix daengx mbanj miz ciij, cisamloek, ciseiqloeki, ci-mozdoz doenghij ci neix 200 lai gyaq, bi 2013 daengx mbanj moix vunz bingzyaenz cinghsouhauej couh daengz 5000 lai maenz, saedceij vunzlai bi ndei gvaq bi.

Geij bi neix daej, Mbanjbuzlit lij guh ndei gij hong "lajmbanj seuqcingh", cang moq rogciengz aenranz, miz dingzlai ranz cang le aenndatraemx ndatndit, ranzranz vat miz caujgiciz, ndaw mbanj roen luengq cungj bu hwnj suijniz; guh le lanzgiuzcangz, daizheiq, vwnzdij hoz-

dungsiz doenghij vwnzva sezsih neix, hawj yiengh mbanj moqsag. Gvaq cieng gvaq ciet, seizhoengq roxnaeuz doengxhaemh, vunzmbanj cungj comz bae guh vwnzdij hozdung, ciengq go diuq foux yienjheiq, dwk lanzgiuz dwkbej, gak boux gag angq, nauhyied vuenyungz.

Bineix, Mbanjbuzlit youh caeuq gunghswi hung doxgap, dawz benq reih bakmbanj laebbaenz le aen suen mbaetsou lwgmak seiqgeiq ndeu, dangqnaej gaenq cienzbouh ndaem le makleiz, maknimhenj, makbugmaed, makcengz doenghij dingomak neix, caiq gvaq song sam bi dem, gizneix couh ndaej bienqbaenz aen suenmak homftwftw yinx vunz ndeu, baenz diemjrongh gyoengq vunzmbanj dem-lai souhauej ndeu.